

欽定全唐文

欽定全唐文卷一百四目錄

後唐莊宗二

許求外職勅

答降龍大師讓法號紫衣勅

入洛招撫勅

幸洛京祀南郊勅

止進獻勅

許劉岳終喪勅

答李德休請詳定本朝法書勅

簡收德勝寨等處軍士骸骨勅

元元廟枯檜再生勅

親至懷州奉迎太后勅

定內外官寮職事勅

南郊減選勅

禁請託勅

授獻書人官勅

搜訪被害臣寮勅

放免四京秋稅勅

限決禁囚勅

葺修宮殿勅

不準權停選舉勅

允張全義請萬壽節於嵩山琉璃戒壇度僧勅

幸東京勅

禁短陌勅

約勒見錢勅

禁徵納禮錢勅

遷昭帝陵勅

令李繼麟制置榷鹽勅

更定符蒙正等及第勅

祈雨勅

祈雨勅

祈雨勅

量置陵戶勅

貶張繼孫勅

責授李璘李瓊勅

諸司人吏非考滿不許奏薦勅

宣示朱守殷進古錢勅

以天津橋未通放朝參勅

祈晴勅

賜青州符習奏即墨縣李夢徵室內柱上生芝勅
諭蜀勅

停折納等稅勅

令京西諸道收糴不得徵納稅錢勅

量停三川涇鳳秦隴等州佐雜勅

欽定全唐文卷一百四

後唐莊宗二

許求外職勅

邇聞京百官俸錢至薄骨肉數多支贍不充朝夕難遣僞
庭時刻削嚴急不敢披陳今既混同是行優恤下御史臺
在班行有欲求外職或要分司各許中書門下投狀奏聞
答降龍大師讓法號紫衣勅

爰遣內臣遠頒成命師號旣旌於戒行紫衣無爽於受持
久屬當仁匪宜多讓

入洛招撫勅

朕親驅義旅徑下僞庭凶讎雖已翦除內外或聞騷擾貴
行招諭以示綏懷應諸色官員並仍宜舊勾當當軍百姓
各自安居永無勞弊之虞共睹昇平之代如無量之輩扇
動人心便仰密加追捕嚴行處斷貴從寧謐當體朕懷

幸洛京祀南郊勅

朕猥以寡德謬荷丕基順天行誅因衆除亂刷宗祧之大
恥仗億兆之歡心車書將致於混同寰海漸從於開泰所
宜樂虔清廟禮答園丘已定良辰率遵舊典朕取今月二

十四日幸洛京十二月二十三日朝獻太微宮二十四日朝獻太廟二十五日有事於南郊經過州縣隨事供備不得妄有侵擾百姓應諸處節度防禦刺史等不得遠赴京都擅離治所務從簡儉以副朕懷

止進獻勅

朕大平國患顯紹帝圖廓天地之妖氛救生靈之塗炭方懷至理永保鴻休敦去華務實之規成革故從新之化足可塞僥倖之路絕繁費之源協我無私告爾有位應隨處官吏務局員寮諸軍將校等如聞前例各有進獻直貢奏

章不唯褻瀆於朝廷實且旁滋於誅歛速宜止絕以肅風化

許劉岳終喪勅

左降官均州司馬劉岳有母年踰八十近聞身故既鮮兄弟別無骨肉孤魂旅寄誰爲蓋棺準本朝故事許歸終三年喪服闋如未量移即赴貶所

答李德休請詳定本朝法書勅

李德休譽洽朝端任隆臺憲將舉行於舊典請刪定其法書載閱申陳備見公切

簡收德勝寨等處軍士骸骨勅

自十數年來屢經戰陣殺傷暴露有足閱嗟其德勝寨莘縣楊劉鎮通津鎮胡柳陂戰陣之所宜令逐處差人簡收骸骨埋瘞取係省錢備酒紙招祭以慰亡魂

元元廟枯檜再生勅

當聖祖舊殿生枯檜新枝應皇家再造之期顯大國中興之運同上林什柳祥旣協於漢宣比南頓嘉禾瑞更超於光武宣標史冊以示寰瀛宜委本州太清宮副使常加簡察兼令功德使差道士一人往彼告謝仍付史館編錄

親至懷州奉迎太后勅

頃以未平國恥須運戎機十年親統於驍雄千里久違於
定省寧辭櫛沐嘗切晨昏今已翦蕩元凶宅居中土仰稟
庭闈之訓獲寧宇宙之心恨不得躬詣汾川攀迎法駕皇
太后遠涉山阻將及近畿朕何以端坐闕庭爲拘常禮雖
云舊制未叶斯懷朕今親至懷州奉迎

定内外官寮職事勅

朕自崔臺創業免苑平凶救生聚之倒懸俾寰區之反正
凡云機密深繫憂勤每事多委密司權令決遣貴無停滯

要速施行今則四海一家萬邦同德中土之宸居顯定園
丘之祀禮方終既整皇綱合依舊制使百官各舉其職庶
事不失其宜貴合通規以成永例此後應有公事何色件
合歸樞密院何色件合付京百司至於軍幕之中並在精
詳分擘內外免侵其職分高低貴叶其規程其或百姓軍
人事關爭訟先經州縣都將須依次第披論或致淹停可
詣臺省至若懷冤抑要達禁庭即許投狀匭函別議申雪
此或情非的確理涉僭踰推詰有聞必行朝典兼有衣冠
士族參選官寮或獻所業文章或述從前行止因依駕幸

抵冒乘輿希望恩榮隨張物體更有軍人百姓亦敢將狀
衝突須各示條章絕其容易宜令御史各下諸司河南府
及諸道分明曉示訖其本朝百官有司所行公事仍令御
史臺各取狀申中書門下

南郊減選勅

朕禋祀天地朝享祖宗百司各具其威儀郡吏遂蒙其置
攝希因霈澤以錄微勞然而躁妄之徒經求競進參雜之
道真濫莫分勘職名則半是冗員語人數則又盈千計若
無簡舉並與寵榮不惟開僥倖之門兼恐撓銓衡之務須

明條例方別等差應諸司行事官並付三銓各遣取告勅
考牒解繇入仕厯子等磨勘如文書盡備只欠一選者便
與依資注官欠兩選者與注同類官欠三選四選者與減
一選欠五選至七選者與減兩選欠八選至十一選者與
減三選一奏一除未合入選門者許自同光二年數本官
選數滿日赴集其太常寺先以白身差攝本寺官應奏祠
祭勞考稍深者追取元額補牒簡勘不虛即與正授如因
大禮差補行事有前任官及出身者即須準諸司例追告
勅磨勘其諸色黃衣欠兩選者與減一選應官資已高不

合銓司注擬者亦委子細簡勘送名中書門下如全無文書稱失墜官告勅簡勅甲又無證據只有格式公驗并諸司諸州府公憑及試授官文牒兼文書過格年月深遠者並宜落下所冀官無濫受恩不虛行

禁請託勅

選舉二門仕進根本當掄擇於多士全委仗於有司苟請託是從則踰濫斯極況方行公事已集羣材須行戒勵之文俾絕倖求之路宜令吏部禮部掄材考藝必盡於精詳減私徇公無從於請託仍委三銓貢院榜示省門曉告中

外

授獻書人官勅

史館提舉赦書節文購求經史頗爲允當宜許施行今宜
添進納四百卷已下三百卷已上皆成部帙不是重疊及
紙墨書寫精細已在選門未合格人一百卷與減一選無
選減數者注官日優與處分無官者納書及三百卷特授
試官

搜訪被害臣寮勅

朕祇膺大寶虔奉鴻名勉承夷夏之心以副天人之望雖

德音尋降赦宥近行猶恐恩有所未孚德有所未洽自朱
溫劫遷昭宗至洛京已來內外臣寮有無辜妄遭刑戮者
更宜廣令搜訪各與次第贈官如有子孫並委敘錄

放免四京秋稅勅

治國之由安民是本如聞今歲麥田雖繁而結實不廣其
四京諸道百姓於麥地內察種得秋苗並不徵稅

限決禁囚勅

應御史臺河南府行臺馬步司左右軍巡院見禁囚徒據
罪輕重限十日內并悉決遣申奏仍委西京諸道州府見

禁囚徒速宜疏決不得淹停兼恐內外刑勢官員私事寄
禁切要止絕俾無冤滯

葺修宮殿勅

三川奧壤四海名區爲帝王光宅之都乃符瑞荐臻之地
周都始建卜年遂啟於延洪漢室中興即土是圖於遠大
咸茲建極至我本朝壯麗可觀浩穰爲最千門萬戶實爲
富庶之鄉接廡連甍宛有升平之俗而自僞梁僭逆諸夏
憑陵尋干戈而虐用蒸黎恣塗炭而毒流草木依憑兔苑
嘯聚梟巢遂令輦轂之間鞠興蕪沒之歎朕自削平大憝

纂嗣丕圖重興卜洛之都永啟朝宗之會將資久遠須議葺修務令壯觀於九重實在駢羅於萬戶京城應有空閒地任諸色人請射蓋造藩方侯伯內外臣寮於京邑之中無安居之所亦可請射各自修營其空閒有主之地仍限半年本主須自修蓋如過限不見屋宇亦許他人占射貴在成功不得虛占

不準權停選舉勅

舉選二門國朝重事俱要精確難議權停宜準常例處分允張全義請萬壽節於嵩山琉璃戒壇度僧勅

張全義首冠王臣心明佛性資善宏於淨衆增福聚於皇
基將欲壇啟琉璃人銓駕鷺實彰忠節宜示允俞

幸東京勅

大名重地全魏奧區成予定霸之基致我興王之業蓋以
土田沃衍庶士忠勤載想夤緣得無睽矚近者頻令按察
頗樂和平旣堅望幸之誠宜舉省方之典取來年正月七
日朕當巡幸東京

禁短陌勅

買賣人所使見錢舊有條流每陌八十文近訪聞在京及

諸道市肆人戶皆將短陌轉換長錢今後凡有買賣並須使八十陌錢如有輒將短錢與販仰所在收捉禁治

約勒見錢勅

諸道州府約勒見錢素有條制若全禁斷實匪通規宜令三京諸道州府城門所出見錢如五百以上不得放出

禁徵納禮錢勅

兵吏部以臺省禮錢爲名所司妄有留滯在京者遽難應付外來者固是淹延須至條流冀絕訛弊自此後特恩授官侍衛軍功改轉內廷諸司帶職外來進奉闕廷綾紙並

宜官給無令收買舊例朱膠一切停廢禮錢亦不徵取又
慮所司困闕人吏不辦食直糧課逐月兩司各支與錢四
十貫文至於臺省禮錢宜特蠲減比舊數五分許徵一分
其特恩已下並不得徵納禮錢仍令中書門下條流勅畫
經過諸司無至停滯其官告如是宣旨除授及品秩合進
呈者準例送回餘並送納中書門下點簡給付勅書到本
司十通已上官限三月內印署了三十通已上限五日五
十通已上中書門下與催促如臨時緩急宣賜不拘此限
少府監鑄造印文元屬禮部兩司無有推注停滯諸道使

臣廣徵銅炭價錢納後別須邀索自此凡鑄印宜令本司限勅到五日內進呈不計諸道在京並不得徵納銅炭價錢所破料物並計數於租庸院請領仍預常給付價錢使盡計帳於租庸院更請或有故違必行憲典

遷昭帝陵勅

朕顧惟寡德獲嗣丕圖奉先之道嘗勤送往之誠靡怠爰自重興廟社載展郊禋旋蕩滌於瑕疵復涵濡於慶澤蓋憂勞靖國曠墜承祧御朽若驚涉川爲懼繇是推移歲月鬱滯情懷恭念昭宗晏駕之辰少帝登遐之日咸罹虺毒

遠殞龍髯委冠劍於仇讎託山陵於梟獍靜惟規制豈叶
度程存愴結以彌深固寢興而增惕虔思改卜式慰允懷
宜令所司別選園陵備禮遷葬貴雪幽明之故以申追慕
之心凡百臣寮體朕哀感

令李繼麟制置榷鹽勅

會計之重鹹鹺是先矧彼兩池實有豐利頃自兵戈擾攘
民庶流離旣場務以墮殘致程課之虧失重茲葺理須仗
規模將立事以成功在從長而就便宜令李繼麟兼兗州
節度度支安邑解縣兩池榷鹽使便可制置一一條貫所

有合置官吏等亦委自使選差

更定符蒙正等及第勅

禮部所放進士符蒙正等四人旣慊羣情實干浮議近令覆試俾塞輿言及再覽符蒙正並成僚等程試詩賦果有疵瑕若便去留慮乖激勸儻無升降即昧甄明況王徹體物可嘉屬辭甚妙桑維翰差無紕繆稍有功夫其王徹升爲第一桑維翰第二符蒙正第三成僚第四

祈雨勅

亢陽稍甚祈禱未徵將致感通難避勞擾宜令河南府於

府門造五方龍集巫禱祭徙市

祈雨勅

時雨少愆恐妨農事須命祈禱冀遂豐登宜令差官分道
祈禱百神

祈雨勅

時雨尚未霑足宜令河南府徙市閉坊門依法畫龍置水
祈請令宰臣於諸寺燒香

量置陵戶勅

關內諸陵頃因喪亂例遭穿穴多未掩修其下宮殿宇法

物等各令奉陵州府據所管陵園修製仍四時各依例薦饗及逐陵仰差近陵百姓二十戶放雜差遣充陵戶備灑掃其壽陵等十二陵亦一例修掩可量置陵戶

貶張繼孫勅

有善必賞所以勸忠孝之方有惡必誅所以絕姦邪之迹其或罪狀騰於衆口醜行布於近親須舉朝章冀明國法汝州防禦使張繼孫本非張氏子孫自小丐養以至成立備極顯榮而不能酬撫育之恩履謙恭之道擅行威福嘗恣姦凶侵奪父權惑亂家事從鳥獸之行畜梟獍之心有

識者所不忍言無賴者實爲其黨而又橫征暴斂虐法峻
刑藏兵器於私家殺平人於廣陌罔思悛改難議矜容宜
竄逐於遐方仍歸還於姓氏俾我勲賢之族永除汙穢之
風凡百臣寮宜體朕命可貶房州司戶參軍同正兼勒復
本姓

責授李鱗李瓊勅

罰罪賞功大朝常憲掩瑕宥過前聖格言工部侍郎李鱗
宗正少卿李瓊等早在公途忝居班列靡思畏懼各犯刑
章因補置官吏之秋見詐僞依違之迹自招罪狀合寘嚴

科但以常預臣僚始當興復特示哀矜之旨俾寬流遣之
文降秩趨朝殊爲輕典推恩念舊所宜慎思鱗可責授朝
散大夫司農少卿瓊可責授朝議郎守太子中舍

諸司人吏非考滿不許奏薦勅

諸司人吏授官從來只繫勞考年滿赴選方許離司近日
已來頗隳條制到司曾無考課公事尚未諳詳便求薦論
深爲僥倖遂使故事都失蓋繇舊人不存豈惟勞逸之無
均兼致司局之曠敗自今年除勞考滿三銓注官即許赴
任非時不得奏薦如有注掌難重勞績可稱許本司奏聞

當與減選或是顯然事迹在司年深齒髮祗役不任即許解職赴任餘切依格條處分

宣示朱守殷進古錢勅

凡窺奇異盡繫休明所獲錢文式昭元既得一者佇歸於一統順天者式契於天心道煥一時事光千載殊休繼出信史必書宜付史館

以天津橋未通放朝參勅

如聞天津橋未通往來百官以舟船濟渡因茲傾覆兼蹈泥途自今文武百官三日一趨朝宰臣即每日中書視事

祈晴勅

霖雨未止恐傷苗稼及妨收穫宜令差官於諸寺觀神祠虔心祈禱仍令河南府差官應有靈迹處精虔祈止

賜青州符習奏即墨縣李夢徵室內柱上生芝勅符習累居藩翰屢顯政能靜以臨人寬而得衆撫俗已彰於惠愛輔時又致於休徵因得和氣潛蒸靈芝遽產同九莖而表瑞比三秀以呈祥載閱奏陳良深嘉歎

諭蜀勅

朕以蜀部封疆本是我唐境土爰從兵革遠阻江山當僞

梁篡弒之時致宗廟震驚之難遂滋割據益遂便安雖行
建號之謀乃是從權之道況復蜀主先父素是本朝舊臣
常懷忠孝之心每俟興隆之運惟期恢復却效傾輸朕以
初殄寇讎重興社稷撫諭之恩既廣憂勤之意常深須務
綏和貴諧混一遂令元子兼命宰臣遠安僉后之心既協
來王之願遐想王師行李已及彼地城池遠降詔書明行
示諭料其素志必協夙心當符魚水之歡永保山河之誓
僞蜀文武官寮等或本朝舊族或當代英賢或抱節於軍
戎或著名於鄉曲久從睽隔常軫情懷宜知乃睽之恩各

勵輸誠之節今已降勅命誠約諸道兵帥如西川果決歸
降到城不得驚擾但思效順勿致懷疑

停折納等稅勅

本朝徵科唯有兩稅至於折紐比不施爲宜依李琪所論
應逐稅合納錢物斛斗及鹽錢等宜令租庸司指揮並準
元徵本色輸納不得改更若合有移改須具事由聞奏請
下中書門下商量別候勅旨

令京西諸道收糴不得徵納稅錢勅

今歲自春以來水滂爲患物價騰湧人戶多於西京收糴

斛斗近聞京西諸道州府逐道皆有稅錢遂不通行乃同
閉糶宜令宣下京西諸道州府凡收糶斛斗不得輒有稅
錢及經過水陸關防鎮縣妄有邀難

量停三川涇鳳秦隴等州佐雜勅

三川涇鳳秦隴等州縣官員數目極多其上佐官自少尹
已下依本朝舊制各具見任員闕申奏其州判司準近制
置錄事參軍司戶司法參軍各一員縣置縣令主簿各一
員餘並停其出替選任一準三銓常式

欽定全唐文卷一百五目錄

後唐莊宗 三

答諫官請不幸汴州批

答兩省諫官請不幸汴州批

平汴州大赦德音

減膳宥罪德音

賜錢鏐吳越國王冊文

改元同光赦文

南郊赦文

欽定全唐文

卷一百五

目録

曉諭梁將王檀書

諭兗鄆羣盜書

讓契丹阿保機書

禡牙文

欽定全唐文卷一百五

後唐莊宗 三

答諫官請不幸汴州批

朕以四海雖寧五兵不可不訓聚之王室務壯神京其如人賴餼糧馬資藁秸飛輓動勞於四達經謀全繫於有司近以水潦爲災租賦失額欲巡方岳貴便兵民卿等細察輿情備陳忠懇慮沸騰於物議俾鎮靜於宸居載覽封章深誠嘉畫

答兩省諫官請不幸汴州批

忽披諫疏深沃朕心非因謹直以上聞豈致焦勞之外達
卿以餽運不繼軍食有虧在京則廩食闕如支計則供頓
莫備卿等若別陳意見動叶機宜倘得稍濟軍儲不移警
蹕即當旁詢衆懇盡述良籌佇聞敷敷浣予宵旰

平汴州大赦德音

仗順討逆少康所以誅有窮績業承基光武所以滅新莽
咸以中興景命再造皇猷經綸於草昧之中式過於亂略
之際朕以欽承大寶顯荷鴻庥雖繼前修固慙涼德此以
誓平元惡期復本朝屬四海之阡危允萬邦之推戴近自

親提組練徑掃氛妖振已墜之皇綱殄偷安之寇孽國讎
方雪帝道爰開拯編吐覆溺之艱救率土倒懸之苦粵自
朱溫搆逆友貞嗣凶篡殺二君隳殘九廟虺毒久傷於宇
宙狼貪肆噬於華夷剝喪元良凌辱神主帝里動黍離之
歎朝廷多棟橈之危棄德崇姦窮兵黷武戰士疲勞於力
役蒸民耗竭其膏腴言念於斯軫傷彌切今則已梟逆豎
大豁羣情覩厯數之有歸顯神靈之匪昧得不臨深表志
馭朽爲懷將宏濟於艱難宜特行於省宥應僞命流貶責
授官等已經量移並可復資徒流人放歸鄉里京畿及諸

道見禁囚徒大辟罪降從流流已下並赦除之其鄭珏等
一十一人未在移復之限懋德賞功百王明訓疏封列爵
國有通規應扈從征討將校及諸官員職掌軍將節級馬
步兵士及河北諸處屯駐守戍兵士等皆情堅破敵業茂
平讎副予戡定之謀顯爾忠勤之節並據等第續議獎酬
其有交鋒戰陣沒於王事未經追贈者各與贈官如有子
孫成立堪任使者並量才甄錄叛之則懲服之則捨蓋前
經之奧旨爲當代之通規既屬纂承是務遵守應舊僞庭
位居藩翰任處專城或掌握兵權或捍防邊鄙各爲其主

以全其名既解甲以歸明或飛章而送款變通斯覩忠節
可嘉其逐處節度觀察防禦團練等使及諸州刺史監押
及僞庭先差出行營將校都監等並頒恩詔不議改更仍
許且稱舊銜當候別加新命理國之道莫若安民勸課之
規宜從薄賦庶遂息肩之願冀諧鼓腹之謠應諸道戶口
宜並罷其差役各務營農所係殘欠稅賦及諸務懸欠積
年課利及公私債負等其汴州城內自收復日已前並不
在徵理之限應天下諸道自壬午年十二月已前並放其
兵戈蹂躪之地水旱災沴之鄉苗稼不登賦徵既減應今

年霜旱所損田苗處檢覆不虛便據畝隴蠲免兼北京及河北先爲祆祲未平配買征馬如有未請却官本錢及買馬不迨者可並放免往哲宏仁有興滅繼絕之道前王惻隱垂矜孤恤寡之文應有本朝宗屬及内外文武臣寮被朱温無辜屠害者並可追贈之如有子孫及本身逃難於諸處漂寓者並所在尋訪津送闕庭當行升陟其有義夫節婦孝子順孫並宜旌表門閭量加賑給或鰥寡孤獨無所告者仰所在各議拯救或有身過八十者免一子從征殷王以恩推解網並務好生帝堯以引過責躬乃思舍垢

應有先投過僞庭將校官吏等一切不問事由無令輒有
恐動側席求賢將臻至理懸旌進善或贊鴻猷應名德有
稱才藝可取或隱居朝市或遁迹林泉並仰逐處長吏遍
加搜訪津致赴闕朕當量才任使兼僞庭僭逆以來凡有
寃抑沈滯之人宜並特與申雪仍加遷陟封遺冢而葬枯
骨義出周王祀名山而祭大川禮傳虞帝既立規於前古
足垂訓於後昆應所在賢士邱墳並仰聞奏當議封樹或
有暴露骸骨亦委逐處葬埋或有百神祠宇不得有虧時
祭應德音內有節文不該者並仰所司重具起請分析聞

奏當議施行於戲患難以平咸自忠良之力瘡痍未息宜施撫育之恩更在文武元臣中外耆德覩覆亡而立戒竭忠蓋以爲謀無縱驕矜須知廉慎同致昇平之道永全開創之功布告遐邇當體朕懷

減膳宥罪德音

蓋聞兵者凶器戰者危事故聖王不得已而任之是以大兵之後必有凶年朕自收復汴州戡定蜀郡雖當時秋毫無犯而已前乃十載勞師每歲傷痍寧無災沴言功於己曾莫繼於百王語德於人況未洽於兆庶遂至去歲水潦

爲災自京以東幅員千里田疇悉多荒廢人戶未免流亡
賦租既輸納不充軍食又轉運未及物價騰涌人心煎熬
既視人以如傷每敬天而忘戒朕近欲親幸梁宋徧恤生
靈又恐大駕省方百司云從道途寧免勞擾州縣復備供
承轉慮凋殘莫知攸濟朕自今月三日已後避正殿減常
膳徹樂省費以答天譴應同光三年經水災處有不迨及
逃移人戶差科夏秋兩稅及諸折配色委長吏切加點檢
並與放免仍一年內不得雜差遣見在者加意撫恤流徙
者設法招攜其田宅無任有力人戶占射及隣近毀拆務

令歸復以惠傷殘且念給養兵戎撫綏疲瘵冀連營而粗
濟思比屋以乂安危困生靈倍懷憂切近者爰頒御札務
切濟時有所便宜朕無不聽近歲賦稅尚恐懸闕遠年逋
欠豈可督征不惟虛係於簿書兼亦轉困於生聚致其流
散職此之由應壬午年已前百姓所欠秋夏殘稅及諸色
課利錢物先有勅文悉已放免近聞或不遵守依前却有
徵收仰下租庸司及諸道州府切準前勅處分如或更有
違越任百姓詣闕論訴當議勘窮以定贓罪其同光元年
當戰伐之後是平蕩之初人戶流離多未復業困於租賦

須議矜蠲其諸色殘欠差稅及不迨係官課利並與放免
分明曉告各遣聞知又輦轂之中郊甸之內時物涌貴人
戶饑窮訪聞自陝以西遐及邠鳳積年時熟百穀價和縱
未能別備於貢輸亦宜廣通於糶糴近聞輒有稅率已曾
降勅指揮尚慮關鎮阻滯行人增長物價仰所在長吏切
加檢勘以濟往來推救災恤患之心明奉國憂人之道又
京圻之內自全義制置已數十年每聞開墾荒蕪勸課稼
穡曾無歉歲甚有餘糧公私貯蓄極多收藏未肯出糶欲
俟厚價頗失衆情宜令中書門下條流應在京及諸縣有

停貯斛斗並宜減價出糶以濟公私如不遵行即仰聞奏
別具檢括仍委河南府切詳勅命處分伐罪弔人既叶前
王之令推恩布澤敢忘當代之憂應三川管內王衍父子
僞署將相文武官及諸色職吏等除罪名顯著已從刑憲
外脅從者固是無辜同惡者亦以歸命一切釋放更不勘
尋仍不得將今日已前事敢有告論貴宣曠蕩之澤以安
反側之心我國家奄有四海垂三百年西至日入罔不來
賓凡有遐方皆我赤子久陷僭僞寧無憫嗟應三蜀管內
百姓除秋夏兩稅及三司舊額錢物斛斗并繼岌崇韜申

奏減落徵收外所有無名配率急徵橫斂毒害生靈者更
委本道新除節度使上後於管內一一檢勘細具聞奏當
與放免俾惠傷殘應在京及天下州府凡有繫囚除十惡
五逆官典犯贓屠牛鑄錢火光劫舍持刃殺人準律常赦
不原外合抵極刑者遞減一等並貸餘生其次罪等悉與
減降䟽理釋放不得久有禁繫自同光元年後或有犯罪
流人情非巨蠹者並許歸還應行營及在京諸軍皆役官
健偶因過犯便至奔逃懷憂懼以離家忍饑寒而在外事
非在已情亦可矜委所在如有此色人切加招撫或要却

歸都幕或願遂便營生盡捨愆尤悉皆聽許春以生而秋以殺天之道也德以教而刑以威君之政也朕惟寡薄敢忘憂勤唯將德惠以臨人庶免災害之及物旣垂天戒未致時雍爰施布澤之文是表責躬之道中外臣庶遐邇生靈宜體朕懷罔有不敬

賜錢鏐吳越國王冊文

維同光三年歲次乙酉八月辛酉朔二十七日丁亥皇帝若曰王者惠濟黎元輯寧方夏重名器任股肱忠而能力則禮崇賞不失勞則人勸所以啟周公之土宇裂漢祖之

膏腴錄彼茂勲寘之異數登進賢哲焜燿事功也天下兵
馬都元帥尚父守尚書令吳越國王錢鏐朝海靈源承天
峻岳以英風彰德望以勇氣贊忠貞往因義舉之徒盛推
韜略遂著龔行之績高步藩維挺魚鯤鳥鳳之姿擁岸虎
水龍之衆居方面任將五十年宣導休聲攘除凶醜摧堅
奮銳鄙許東固圍之謀阜俗頒條廣冀北安居之頌環塹
浙江之要雲滋星紀之墟說禮敦詩位崇元帥前茅後勁
名重中權守畫一之規奉在三之節信立靡移於風雨義
行曷倦於津塗效珍則不顧險難薦幣則常歸宰府振英

謨而端右弼鍾懿號而異列藩可謂職貢不乏梯航時至
翼戴天子加之以恭也載念尊獎爰示徽章今遣正議大
夫守尚書吏部侍郎上柱國贊皇縣開國男食邑三百戶
賜紫金魚袋李德休使副朝議郎守起居郎充史館修撰
賜緋衣魚袋聶瑛持節備禮胙土苴茅冊爾爲吳越國王
於戲地畫數圻賦過千乘墨守闔閭之境軌圍甸踐之封
子弟量才序進多分於棨戟土疆漸海方輸豈限於魚鹽
貴盛富強雖古之封建諸侯禮優夾輔不加於此慎厥初
圖厥終無以位期驕無以欲敗度欽承賜履翼予一人

改元同光赦文

法天取象令王以降衷下民秉籙承乾哲后以膺圖受命
莫不運推歷數道濟艱難經綸於草昧之中式過於亂略
之始君臨兆庶子惠萬邦壽域將登眚災是宥朕顧慙涼
德誠媿前修祇荷鴻休恭修清問將布維新之政是覃革
故之恩遐按彝章溥頒成憲爰自夙承丕構世奉本朝誓
雪恥於君親欲再安於廟社所以躬提義旅力殄凶徒漸
致小康永清中夏俄屬列藩羣后不謀同辭咸稱僞逆干
天宗祧乏享眷命所屬主鬯攸歸以朕籍係鄭王志存唐

室合中興於景祚須再造於洪基推戴既堅讓辭靡獲既難違衆遂命有司乃擇元辰率遵前典尋外壇而奠玉仍即位以建元欽若舊章敬敷霈澤宜改天祐二十年爲同光元年可大赦天下自四月二十五日昧爽已前除大辟罪已下罪無輕重已發覺未發覺已結正未結正咸赦除之惟犯十惡五逆光火行劫持刃殺人官典犯賊屠牛鑄錢合造毒藥不在原赦之限鎮州自收復已來累行告諭或因緣危艱爲保家族久在山中寨柵懼罪遲疑或被張文禮脅從事不獲已者昧爽已前一切不問咸從赦宥宜

體予懷應六軍及行營馬步蕃漢諸道將校兵士等皆以
身先冒刃志切勤王或竭節於忠勞或連年而征戍須加
恩獎倍撫苦辛其將校尉並賜功臣名號未有官者即超
一資與檢校官已有官者亦超一資如官資已高者與加
爵邑如曾封爵者即給一子六品已上正員官其長行兵
士並賜功臣名號應將士等並勒逐處各定等第優賞應
有大勲上將元老重臣或盤維每賴於急難或邦國早資
於經濟即安義令公實昆仲之長護軍特進同骨肉之恩
不可以名氏標文不可以臣下同等嘉庸如在崇德未申

其次有戰沒陣場身終王事須顯忠彝之美咸隆贈諡之榮周德威蓋寓李存璋李思恩李嗣本李存進伊廣等兼應該勅文者並委中書門下各令所司一一具奏各加追贈仍定諡號貴流王澤永飾泉扃應諸道管內有高年踰百歲者便與給優永俾除名自八十至九十者與復一子免役州縣不得差役鄉里有孝子順孫義夫節婦委所在長吏錄其節行具以聞奏盡據典章必行旌表内外文武官及諸色人任封事兼有賢良方正抱器懷能或利害可陳無所隱諱直言極諫將一一行之亦委諸道長吏具姓

名申奏或所在有義行頗高爲鄉里所推者並仰準例舉
選所司量才任使澤潞封疆兄弟之國追思舊績言念疲
民惠在綏懷恩加撫字各仰沿邊鎮戍布命宣陳咸令樂
業營生無使侵疆爲患應有奉使危邦罹殃殊域旣遭陷
害深可憫傷如伊鐸蓋寓戴漢超李承勳之徒並仰所司
具名錄奏朝廷必議褒贈其貢舉之道誘導爲先切要便
行貴申獎士委中書門下速商量聞奏其雲應邊陲北山
入軍易定幽燕邊陲諸縣自鮮卑入寇仍歲纏災睽彼流
人良堪興歎或乍來復業纔擬營農尚怯侵擾須加慰恤

其稅率仍委長吏量與矜減凡有逋毒孤貧惸嫠寡歷
代皆聞於教化自古共切於軫傷勉致噢咻遍加惠養應
有欠負不繫公私若曾重出利累經徵理填還不迨者並
皆釋放夫掩骼著在前經敬神垂於古典告布諸道州縣
所在應有暴露骸骨並勒逐處埋瘞及山林川澤祀典神
祇各隨處差官崇修祭享教之爲本禮儀是先德之所崇
昭報在上其民間有曾經三世已上不分居者並與蠲免
諸雜差徭倘兵銷患息何須有丹鳳白麟若歲稔人和何
必有紫芝赤雁起今後諸道應有祥瑞並不要奏聞其赦

文中有未該詳事節者即仰所司條件錄奏如敢以赦前
事相告者以其罪罪之

南郊赦文

體元立極樹司牧者大君創業開基定禍亂者真主是以
肇分正氣斷鼇足而定四維眇覲元風抗龍首而朝萬國
兆人歸往率土駿奔同興牧野之師共赴塗山之會恭行
弔伐廣示驅除纔應順於人心俄恢張於戎略未踰半歲
悉集大功翦窮后於夏郊擒漸臺於新室配天纂祀冤恥
咸申向闕來庭華夷率服再移星律得事郊禋獲申報本

之儀已展告虔之禮顧惟寡薄愧畏尤深久屬僞室凶狂
彝倫失序照臨之內愁疾略同爰當改物之辰乃布惟新
之慶與人更始以答天休可大赦天下應同光二年二月
一日昧爽已前大辟罪已下所犯罪無輕重已發覺未發
覺已結正未結正見禁囚徒常赦不原者咸赦除之十惡
五逆屠牛鑄錢故意殺人合造毒藥持仗行劫官典犯贓
不在此限賞不失勞百王令典人惟求舊有國通規當宜
廣示優恩務酬嘉績應自來立功將校兵士等皆久經戎
陣備覩辛勤並宜各轉官資仍加賞給應僞朝流人並左

降官未經量移者即與量移已量移者即與復資尚慮道
路遐遙未盡知悉中書門下再舉勅文應内外文武常參
官節度觀察防禦刺史主軍都指揮使等夙夜在公冰泉
斯戒旣著顯親之道宜嘉事主之誠父母亡歿並與追贈
追封在者各與加爵增封四品已上扈從翊衛整肅威儀
展我國容俾成大禮應南郊掌儀仗隨駕官員各有勞獎
其扈駕樓下立仗將士及河南將校兵士等亦各賜等第
優賞睠惟盡瘁言念輸忠率玉帛以來庭賚郊廟而貳事
旣崇丕烈特顯殊恩凡關竭力之元勳宜舉報功之茂典

應藩鎮使臣各賜一子出身仍加功臣名號諸道留後刺史官高者加爵階一級官卑者加官一資宗子維城本支百代禮旣行於配祖情敢怠於睦親應本朝皇親近屬因緣僞梁竄遁遐遠並仰所在搜訪如非謬妄即與奏聞到京委宗正寺簡勘不虛並與量才敘錄網羅之中無由自奮蜂蠆之內竟至無辜旣淪沒於濫刑宜申明於真節凡本朝內外臣僚枉被朱溫殺害者並仰所司具銜申奏特與追贈仍搜訪子孫量加錄用事主之道以立節爲先致理之方以賞善爲本其懷才抱器不事僞朝衆所聞知顯

有節行仰所在官吏將所著事狀具姓名聞奏當加甄獎兼授官秩皇王御宇禮三恪而爲賓士庶敦風賴五常而濟世當宜封崇後嗣欽若前修應前代二王三恪及文宣王之後並可各令繼襲仍加恩命所有祖宗廟宇亦宜各與增修其隨處合得俸戶并子孫戶下差稅征徭仍委中書門下較本朝格律施行堯鼓明懸貴聞進諫舜旌旁建比爲來賢是宜廣納話言庶箴闕政洎僞梁人滋澆薄朝掩忠良蔑聞投水之規莫識從繩之路此後應內省文武常參官并前資草澤之士有謀分利害事合機宜並許上

表敷陳朕當選長旌錄如有性多毀譽私貯愛憎承寬偶恃於得言縱志惟專於罔善朕亦潛令伺察親要審詳狡蠹有彰罪刑無捨錢者古之泉布蓋取其流行天下布散人間無積滯則交易通多貯藏則士農困故西漢興改幣之志立告緡之條所以權畜賈而防大姦也宜令所司散下州府常須檢較不得令富室分外貯見錢又工人銷鑄而爲銅器兼沿邊州鎮設法鈐轄勿令商人般載出境被服錦繡貴賤有倫裁製衣裝短長有度苟無彝則必害女工近年已來婦女服飾異常寬博倍費縑帛有力之家不

計卑賤悉衣錦繡念蠶織之匪易顧法制之不行須示條
流冀漸遵守委所司散下文榜曉諭御史臺及諸道觀察
糾舉違勅水旱之鄉饑寒宜恤兵戈之地勞弊堪傷鄴城
及河東久興師旅頗困生靈其近襄州縣又輦運徭役無
時暫息應北京以北諸州界及至新州幽州鎮定管界契
丹侵掠井邑凋殘兼遼州沁州南界及安義北界澤州諸
縣河陽向下至鄆濮齊棣已來邊河州縣數年兵革至甚
凋殘自此並宜倍加撫安召令復業應人戶所輸租稅特
與蠲減已從別勅處分兼諸道州縣有經霜水旱之災所

損田苗納稅不迨懸欠處仰子細簡詳如不虛妄特與蠲免頃以未殄寇讎嘗勞戰伐況於邊鄙足見凋傷旣歲月之滋深在逋逃而可念或主持錢穀管係牛羊旣已罄空須憂徵督將叶來蘇之詠宜施在宥之恩應近邊界州縣人戶有舊主持官錢斛斗牛羊諸雜課利送納不迨者並令蠲放自兵屯郊境事迫機宜互有侵漁交相虜掠旣變良而爲賊實威脅以勢驅人或銜冤朕寧無慮可各下諸處有百姓婦女俘虜他處爲婢妾者願歸即並不得占留一任骨肉識認其丈夫曾被刺面者仰勘所在村保如委

不係食糧人數便勒本州府各與憑據放逐營生鄉村糶
貨斗斛及賣薪炭等物多被牙人於城外接賤糶買到房
店增價邀求遂使貧困之家常置貴物稱量之際又罔平
人宜令府縣及御史臺於諸門嚴切條流不得更令違犯
應天下見使斗秤並是偽朝所定宜令所司別造新朝斗
秤頒下諸道其見使者納官毀廢三館蘭臺藏書之府動
盈萬卷詳列九流爰自亂離悉多遺逸須行搜訪以備討
尋應天下有人能以經史及百家之言進納者所司立等
第酬獎喪葬之典合式具言使貧者足以備其儀富者不

得踰其制頃自淳風漸散薄俗相承不守等威競爲僭侈
生則不能盡其養沒則廣費飾其終自今後仰所司舉明
條制勿令踰越若故違犯嚴加責罰歷代以來除桑田正
稅外只有茶鹽銅鐵出山澤之利有商稅之名其餘諸司
並無稅額僞朝已來通言雜稅有形之類無稅不加爲弊
頗深興怨無已今則軍需尚重國力未充猶且權宜未能
全去且檢天下桑田正稅除三司上供既能無漏則四方
雜稅必可盡除仰所司速檢勘天下州府戶口正額墾田
實數待憑條理以息繁苛國以人爲本人困則國何所依

人以食爲天食艱則人何以濟聞僞朝已來恣爲掬歛至於雜色斛斗柴草受納倉場邀詰人戶分外誅求納一斗則二斗未充納一束則三束不了互相蒙蔽上下均分疲敝生靈莫斯爲甚自今後仰長吏選清強官吏充主納仍須嚴立條制以防姦欺兼具逐色所納加耗申奏當官者宜守於朝章力田者宜遵於王制苟容僥倖必亂規繩訪聞富戶田疇多投權勢影占州縣不敢科役貧下者更代征徭轉致凋殘最爲蠹弊將安疲瘵須擇循良應僞庭內班朝寮及諸色主掌職員等遭無辜殺害者並許昭雪歸

葬共理者太守之官親人者縣宰之任戈鋌稍弭政術爲
先刺史縣令有勸課農桑招復戶甲增加稅額檢勘不虛
委本道觀察使條件奏聞當加進陟如貪惰不理害及於
人者速便停替務於葺養稱朕意焉況親人之官無先於
令錄致理之道必擇於才能苟選任不自於朝廷則恩澤
全歸於侯伯今日諸道奏請授官人數轉多闕員全占交
隳體例須正條綱委中書門下舉舊例條理聞奏刺史總
一州之政縣令專百里之權至於糾督之司並謂親人之
任僞朝取士多不擇才蓋自藩方奏論及因權勢屬託公

行賄賂蔑顧典章到官唯務於追求在任莫思於葺理或聚蓄更希後任或掣斂以報前恩上下相蒙遠邇爲害生靈困敝職此之由自此牧守令錄之官委中書門下精加選擇至於三銓注擬亦在審詳吏能如貪猥有聞不得更授令錄及到官後委本道觀察使切加鈐轄仍勒本州判官專爲訪察如掩贓罪不具聞奏豈唯獨罪本官兼亦累及長吏至於義夫節婦孝子順孫並合搜揚以行旌表德音之所未至赦文之所不該凡百有司各宜申舉於戲圓蓋方輿布陰陽而貿萬物賢臣聖主守紀綱而馭四方所

寶者黎元所重者神器久落姦凶之手每傷忠義之心朕以訓練五兵憂勤三紀收復而親經百戰輯寧而敢忽萬機得不居安慮危慎終如始內則委樞衡於元輔庶顯彌綸外則分符印於列侯務觀製緝股肱惟肅宗社是依朕有過而須言臣有善而無掩使百姓時序萬國咸寧共全可大之功式表中興之道

曉諭梁將王檀書

天維助順神亦害盈有道即興無道即滅昔漢朝中否俄成王莽之妖晉祚中微復起桓元之禍莫不因緣多難構

合異圖謂天地可以心欺謂帝王可以力取殊不知雪霜
之後寒松驗貞翠之姿喪亂之期義士見忠勤之節是故
南陽宗室京口英雄皆懷仗順之謀悉建平勲之策逆溫
崔蒲餘孽畎畝微民因黃巢將敗之秋於白水喪師之後
自知勢蹙遂乃向明聖朝以方切招懷顯行恩渥使從賊
將委以齊壇錫全忠之嘉名居夷門之重地爾後連侵四
鎮疊擁雙旌非聖朝恩澤不深非聖朝有負此賊而乃結
連奸逆攻逼河岐謀害近臣劫遷鑿輅終成大逆遂弒昭
皇殺戮宗枝逼辱妃后萬民相顧而投淚百辟飲恨以吞

聲以致神堯萬代之基陷入碭山豎子之手人祇痛恨天
地慘傷況復自僭逆以來猖狂愈甚忌勲舊則殺傷已盡
貪財貨則溪壑難盈氏叔琮朱友恭之徒蔣元暉張廷範
之輩罪無毫髮皆被誅夷王仲師覆族於前劉知俊脫身
於後如斯統馭何以扶持稍成瓜李之嫌便中讒邪之口
且鎮定兩地聖唐重藩皆世嗣山河代分旄鉞各以生靈
是念封壤求安既拜表以稱臣又竭財而入貢而逆溫不
察忠瘁潛肆窺圖詐稱應援之師盜取深冀兩郡見利忘
義一至於斯欲令天下歸心乃至舟中敵國昨鎮定大王

特差人數徑告敝藩予遂統師徒躬來應援逆溫已令將
王景仁等七八萬衆屯據柏鄉日令步騎攻圍其城終不
出關遂令引退即便前來既落穀中須施毒手東西掩擊
勢若山摧擒戰將二百餘員奪鐵騎五千餘匹橫屍滿野
皆龍驤神捷之徒棄甲如山悉長劔銀鎗之類程思權縷
陳表本張濤亦備述事機然董卓之濟何煩再舉斬桓元
之首正在此時近又岐下淮南皆通聞使咸期春首同起
義師計柏鄉之勝捷遠聞在兩地之戈鋌轉急天時人事
昭然可知伏以公縱嶺名家聖唐勲族因逢國難偶在賊

庭當華夷無事之時滿朝朱紫倘社稷中興之後足顯勲名予高曾自憲宗朝赴闕以來世荷恩寵敢因此際誓復聖唐必不與碭山田夫同戴天而履地予幕賓王緘僕射九月中鳳翔使迴劉知俊令公因遺書示兼傳密意具述足下相與之分最異他人兼憑附達絹書尋令通送又累得潞州相公家兄文字及招得魏博子將聞得逆溫於公君臣之分已有猜嫌曾於故鎮著人密欲窺算皆言紀綱不少謀害稍難頗得事機極不虛謬且公彭門侍中之後鴻勲茂業播在史書豈忍屈節賊庭點污盛族轉禍爲福

去就奚安箕子去殷項伯歸漢棄骨肉猶稱先智全富貴
固是良圖今三鎮嚴師已及城下敢假丹抱仰達英聰倘
蒙俯賜忠言見機知變叶同討逆興復聖唐則身與金石
齊堅名與天地同固蓋以久欽重德是敢先貢直言如明
鑒未迴丹誠尚阻則長濠巨塹築室返耕使飛走以無門
固展覲而有日

諭兗鄆羣盜書

夫相時達變爲智士之良圖擇福知機蓋丈夫之能事故
有竄身山谷不處危邦今古攸同豪傑共貫近聞鄆州山

蹇聚徒實繁並是汴雒舊人充鄆奇士見河南之失險知
僞數之必亡厭血刃於連年避淫刑於虐主必想元元失
所恟恟無依莫知投足之方未有息肩之地予自去冬親
提虎旅徑取楊劉旣獲通津已諧大計視逆豎而便同几
上算梁園而已在穀中謝彥璋營葺梟巢嘯聚河上撩虎
頭而難逃碎首伸螳臂而何暇爭鋒今則虐使生民決開
天塹築隄壅水自固軍營偷生取笑於庸夫作事頗同於
兒戲公私塗炭內外分離旣板蕩以不支固冰消而在即
予俯詳人事仰察天時旣畫成謀已圖大舉控新羈之鐵

馬礪却日之霜戈屈指定期長驅決勝誓平國恥須復家
仇廓妖禳於西郊奉中興於萬葉諸君等或中州義士或
大國遺民困兵革而不保田園避殘酷而深藏溪洞聞余
義舉計各歡然今既屯聚衆多已相統屬須自謀畫自立
功名或則攻取城池便可跨據州縣因茲事勢以決遠圖
梁寇既西有多虞固不暇分兵東去青兗則無人之境齊
鄆則喪亂之州彼若圖之必定成事斯爲上策不可後時
凡有兵機予能接應當俟寰區一統海內爲家可於所得
封疆遂其富貴之願蒼穹白水予所不欺若守險偷生潛

身匿迹終爲亡命自棄何多時不再來機須速決長謀遠
算自可擇焉

讓契丹阿保機書

畫野離疆雖有華戎之別惟忠與信不違蠻貊之邦契丹
王氣稟貞剛心懷仁義爲天山之貴族據玉塞之雄藩恩
加辮髮之鄉威讐控弦之俗往者降情修好款塞通盟各
守封疆交陳贄幣錦車使者嘗馳問遺之書牙帳賢王頗
識會同之禮關山無事風馬有歸青塚路邊罕有射雕之
騎受降城北更無遺鏃之憂永保初終不渝信誓近者盧

文進潛圖凶逆苟避誅夷苞姦蘊惡之情何方可有父
有君之國皆所不容契丹王未始包藏專聽誑惑黨一夫
之罪惡絕兩國之歡盟縱彼犬羊窺吾亭鄣徒割牛耳難
保獸心輒將左衽之徒幸我中原之利見蒐兵甲決戰西
樓暫勞車騎之師佇見藁街之首

禡牙文

南望柏人當漢祖擒奸之地北臨鄆邑有蕭王告類之亭
一則成創業之功一則纂中興之緒予遠提師旅將盪妖
氛假二帝之威靈救萬邦之塗炭俯詳形勝用視郊原陣

雲不散於長空殺氣正衝於殘孽逆溫背惠奸我同盟非
厚載之所容在典刑而無赦將期勦戮以慰蒸人諒我忠
勤幸資神助